

四庫全書

子部

欽定四庫全書

子部

御纂朱子全書卷六十六

詳校官中書臣張姚成

編修臣倉聖脈覆勘

覆校官中書臣王彛憲

校對官中書臣王慶長

謄錄監生臣劉家瑛

欽定四庫全書

御纂朱子全書卷六十六

賦

白鹿洞賦

白鹿洞賦者洞主晦翁之所作也翁既復作  
書院洞中又賦其事以示學者其詞曰

承后皇之嘉惠宅廬阜之南疆閔原田之告病惕農扈  
之非良粵冬孟之既望夙余駕乎山之塘徑北原以東

驚陟李氏之崇岡

地名李家山

揆厥號之所繇得顙趾於榛

荒曰昔山人之隱處至今永久而流芳

陳舜俞廬山記云唐李渤字潛

之與兄涉偕隱白鹿洞後為江州刺史乃即洞創臺榭環以流水雜植花木為一時之勝

自昇元之

有土始變塾而為庠儼衣冠與弦誦紛濟濟而洋洋

廬山

記又云南唐昇元中因洞建學館置田以給諸生學者大集乃以國子監九經李善道為洞主掌其教授江南

野史亦云當時謂之白鹿國庠在叔季而且然矧休明之景運皇穆穆

以當天一軌文而來混念敦篤於化原乃搜剔乎遺邈

盼黃卷以置郵廣青衿之疑問樂菁莪之長育拔雋髦

而登進

謹按國朝會要太平興國二年知江州周述乞以九經賜白鹿洞詔從其請仍驛送之六年以

洞主明起為蔡州張信主簿旌儒學榮鄉校也

迨繼照於咸平又增修而固倦

廬山記又云咸平五年勅重脩又塑宣聖十哲之象

旋錫冕以華其歸琛亦肯堂

而詒孫

郭祥正書院記云祥符初直史館孫冕以疾辭於朝願得白鹿洞以歸老詔從之冕未及歸而

卒皇祐五年其子比部郎中琛即學之故址為屋榜曰書堂俾子弟居而學焉四方之士來者亦給其食悵

茂草於熙寧尚茲今其奚論

廬山記熙寧中作已云鞠為茂草矣

夫既啓

余以堂壇友又訂余以用書

尋訪之初得樵者指告其處客楊方子直遂贊興作

之謀既而劉清之子澄亦哀集故實來寄

謂此前脩之逸迹復闕我聖之宏

撫亦既震於余衷乃謀度而咨諏尹悉心以綱紀吏竭  
廢而奔趨士釋經而敦事工殫巧而獻圖曾日月之幾  
何屹厦屋之渠渠

事具呂祖謙伯恭所作書院記

山慈瓏而遠舍水汨

瀾而循除諒昔人之樂此羌異世而同符偉章甫之我  
我抱遺經而米集豈顙眺聽之為娛實覲宮牆之可入  
愧余脩之不敏何子望之能給矧道體之無窮又豈一  
言而可緝請姑誦其昔聞庶有開於時習曰明誠其兩  
進抑敬義其偕立允莘摯之所懷謹卷頽之攸執彼青

紫之勢榮亦何心乎俛拾亂曰澗水觸石鏘鳴璆兮山  
木萃尊枝相樛兮彼藏以脩息且游兮德隆業茂聖澤  
流兮往者弗及余心憂兮來者有繼我將焉求矣

感春賦

觸世塗之幽險兮攬余轡其安之慨埋輪而繫馬兮指  
故山以為期仰皇鑒之昭明兮眷余衷其猶未替抑重  
異於既申兮徇耕野之初志自余之既還歸兮畢藏英  
而發春潛林廬以靜處兮闔蓬戶其無人披塵編以三

復兮悟往昔之明訓嗒掩卷以忘言兮納遐情於方寸  
朝吾展履而歌商兮夕又賡之以清琴夫何千載之遙  
遙兮乃獨有會於余心忽嚶鳴其悅豫兮仰庭柯之葱  
蒨悼芳月之既徂兮思美人而不見彼美人之脩嫿兮  
超獨處乎明光結丹霞以為綬兮佩明月而為璫悵佳  
辰之不可再兮懷德音之不可忘樂吾之樂兮誠不可  
以終極憂子之憂兮孰知吾心之永傷

詞



虞帝廟迎送神樂歌詞

桂林郡虞帝廟迎送神樂歌者新安朱某之  
所作也某既為太守張侯拭紀其新宮之績  
又作此歌以遺桂人使聲於廟庭侑牲璧焉  
其詞曰

皇胡為兮山之幽翳長薄兮仰清流渺冀州兮何有眷  
茲土兮淹留皇之仁兮如在予我民兮不窮以愛沛皇  
澤兮橫流暢威靈兮無外潔尊兮肥俎九歌兮招舞嗟

莫報兮皇之祐皇欲下兮儼相羊烈風雷兮暮雨

右迎神三章二章四句一章五句

虞之陽兮灘之澣皇降集兮巫屢舞桂酒湛兮瑤觴皇  
之歸兮何許龍駕兮天門羽旄兮繽紛俯故宮兮一慨  
越宇宙兮無鄰無鄰兮奈何七政協兮羣生嘉信玄功  
兮不宰猶彷彿兮山阿

右送神三章章四句

琴操

招隱操

淮南小山作招隱極道山中窮苦之狀以風  
切適世之士使無遐心其旨深矣其後左太  
冲陸士衡相繼有作雖極清麗顧乃自為隱  
適之辭遂與本題不合故王康琚作詩以反  
之雖正左陸之誤而所述乃老氏之言又非  
小山本意也十月十六夜許進之挾琴過余  
書堂夜久月明風露淒冷揮絃度曲聲甚悲

壯既乃更為招隱之操而曰穀城老人嘗欲  
為予依永作辭而未就也予感其言因為推  
本小山遺意戲作一闕又為一闕以反之口  
授進之併請穀城老人及諸名勝相與共賦  
之以備山中異時故事云

南山之幽樣樹之稠枝相樛高拂千崖素秋下臨深谷  
之寒流王孫何處攀援久淹留 聞說山中虎豹晝暉  
聞說山中熊羆夜咆叢薄深林鹿呦呦獼猴與君居山

鬼伴君遊君獨胡為自聊歲云暮兮將焉求思君不見  
我心徒離憂

右招隱

南山之中桂樹秋風雲溟濛下有寒棲老翁木食澗飲  
迷春冬此間此樂優游渺何窮我愛陽林春葩晝紅  
我愛陰崖寒泉夜淙竹栢含煙悄青葱徐行發清商安  
坐撫枯桐不問簞瓢屢空但抱明月甘長終人間雖樂  
此心與誰同

右反招隱

古詩

遠遊篇

舉坐且停酒聽我歌  
遠遊遠遊何所至  
咫尺視九州九州  
何茫茫環海以為  
壘上有孤鳳翔下  
有神駒驥孰能不  
憚遠為我遊其方  
為子奉尊酒擊鉢  
歌慨慷送子臨大  
路寒日為無光悲  
風來遠壑執手空  
徊徨問子何所之  
行矣戒關梁世路  
百險艱出門始憂  
傷東征憂暘谷

西遊畏羊腸南轅犯癘毒北駕風裂裳願子馳堅車躡  
險摧其剛我我既不支瑣瑣誰能當朝登南極道暮宿  
臨太行睥睨即萬里超忽凌八荒無為蹙蹙者終日守  
空堂

友人黃子衡欲之上庠以詩留行

若士有奇操久厭山林卑奮衣千里道已與親友辭子  
行何悠悠世路方如茲歸來亦何日車馬光陸離幽蘭  
生前林擢置白玉墀不以芳意遠結根終不移願子崇

明德潛躍貴因時悲風靜夜聽喬木歲寒姿何以迴軒  
駕千載相與期

古意

兔絲附樸椒佳木生高岡弱蔓失所依佳木徒蒼蒼兩  
美不同根高下永相望相望無窮期相思諒徒為同車  
在夢想忽覺淚沾衣不恨歲月邁但惜芳華姿嚴霜萎  
百草坐恐及茲時盛年無再至已矣不復疑

送劉句甫之池陽省覲六十四丈遂如行在所



上計

雨雪成歲暮之子遠徂征酌酒起相送慨我別離情池  
陽實大藩佐車屈時英子行一請覲上計趨吳京良玉  
懷貞操芳蘭含遠馨臨歧一珍重即此萬里程

晨起對雨

晨起候前障白煙眇林端雨意方未已后土何時乾倚  
竹聽蕭瑟俯澗聞驚湍景物豈不佳所嗟歲已闌守道  
無物役安時且盤桓翳然陶茲理貧悴非所歎

過黃塘嶺

屈曲危厓轉沈陰山氣昏蟬聲高樹暗石瀨淺流喧已  
過黃塘嶺欲覓桃花源無為此留滯驅馬踰山樊

宿白芒畬

早發招賢里夜宿白芒畬川暝前山雨風驚澗樹花途  
陸綿異縣曠黑泊田家逢人聊問路猶恨去程賒

對雨

虛堂一遊鵬驟雨滿空至的礫散方塘冥濛結雲氣勢

逐風威亂望窮山景翳煙靄集林端蒼茫欲無際涼氣襲輕裾炎氛起秋思對此景淒淒還增沖澹意

齋居聞磬

幽林滴露稀華月流空爽獨士守寒棲高齋絕羣想此時鄰磬發聲合前山響起對玉書文誰知道機長

即事偶賦

白煙竟日起雨晦蒼山深老菊不復妍丹楓滿高林抱病寢齋房窓戶結愁陰起望一舒情遐眺豁煩襟人生

亦已勞世路方崎嶇且詠招隱作無為名跡侵

同安官舍夜作二首

官署夜方寂幽林生月初閒居秋意遠花香寒露濡故  
國異時節欲歸懷簡書聊從西軒卧塵思一蕭疎

窓戶納涼氣吏休散朱墨無事一條然形神罷拘役暫  
惓豈非閒無論心與跡

述懷

夙尚本林壑灌園無寸資始懷經濟策復愧軒裳姿效

官刀筆間朱墨手所持謂言殫蹇劣詎敢論居卑任小  
才亦短抱念一無施幸蒙大夫賢加惠寬筆管撫已實  
已優於道豈所期終當反初服高揖與世辭

臨流石

偃蹇西澗濱杌然似枯木下有幽泉鳴上有蒼苔綠來  
往定何人山空此遺躅

懸崖水

秋天林薄疎翠壁呈清曉迢遞瀉寒泉下有深潭悄時

飄桂葉來尋源路殊杳

穿林徑

屈曲上雲端似向崖陰斷行聞山鳥鳴下與泉聲亂去  
去不知疲幽林自成玩

十月朔旦懷先隴作

十月氣候變獨懷霜露悽僧廬寄楸檟饋奠失茲時竹  
栢翳陰岡華林敞神扉汎掃託羣隸瞻護煩名緇封塋  
諒久安千里一歔歔持身慕前烈銜訓倘在斯

冬至陰雨

愆陽值歲晏忽復層陰結一雨散霏微千林共騷屑  
端居遺簿領遠意懷幽潔曠慮守微疴殊方感新節豈伊  
田廬念邱壠心摧折還登東嶺岡瞻佇何由歇

安溪道中泉石奇甚絕類建劒閒山水佳處也  
驅車陟連岡振轡出林莽霧露曉方除日照川如掌行  
行遵曲岸水石窮幽賞地偏寒篠多澗激淙流響祇役  
未忘倦心神暫蕭爽感茲懷故山何日稅征鞅

教思堂作示諸同志

吏局了無事橫舍終日閒庭樹秋風至涼氣滿窓閒高閣富文史諸生時往還縱談忽忘倦時觀非云慳詠歸同與點坐忘庶希顏塵累日以銷何必棲空山

再得古木

青山一何深上下盡雲木中有千歲姿偃蹇卧寒谷明堂不徵材大匠肯回目樵斧莫謾尋從渠媚幽獨

示諸同志



夏木已云暗時禽變新聲林園草被徑端居有餘清端  
居亦何為日夕掩柴荆靜有絃誦樂而無塵慮并良朋  
肯顧予尚有夙心傾深慚未聞道折衷非所寧眷焉撫  
流光中夜歎以驚高山徒仰止遠道何由征

示四弟

十日一洗沐諸生各歸休虛齋息羣響兀坐心悠悠雨  
久苔徑荒林深鳥啼幽階前樹萱草與子俱忘憂

六月十五日詣水公菴雨作

雲起欲為雨中川分晦明纔驚橫嶺斷已覺踈林鳴空  
際旱塵滅虛堂涼思生頽簷滴漚餘忽作流泉傾況此  
高人居地偏園景清芳馨雜悄悄俯仰同鮮榮我來偶  
茲適中懷澹無營歸路綠泱泱因之想巖耕

秋蘭已悴以其根歸學古

秋至百草晦寂寞寒露滋蘭皋一以悴蕪穢不能治端  
居念離索無以遺所思願言託孤根歲晏以為期

秋夕二首

西齋坐竟日曠然誰與儔感茲風露夕始知天宇秋庭  
樹且扶踈時物詎淹留心空累云遠歲月真悠悠  
公門了無事吏散終日閒涼葉何蕭蕭悲吟庭樹間琴  
書寫塵慮菽水怡親顏憶在中林日秋來長掩關

與諸人用東坡韻共賦梅花適得元履書有懷  
其人因復賦此以寄意焉

羅浮山下黃茅村蘇仙去餘詩魂梅花自入三疊曲  
至今不受蠻烟昏佳名一旦異凡木絕艷千古高名園

却憐水質不自暖雖有步障難為溫羞同桃李媚春色  
敢與葵藿爭朝暉歸來只有脩竹伴寂歷自掩疎籬門  
亦知真意還有在未覺浩氣終難言一杯勸汝吾不淺  
要汝共保山林罇

頃以多言害道絕不作詩兩日讀大學誠意章  
有感至日之朝起書此以自箴蓋不得已而有  
言云

神心洞玄鑒好惡審猶云何反自誑閤默還包羞今

辰仲冬節寤歎得隱憂心知一寸光是彼重泉幽朋來  
自茲始羣陰邈難留行迷亦已遠及此旋吾輶

壽母生朝

秋風蕭爽天氣涼此日何日升斯堂堂中老人壽而康  
紅顏綠鬢雙瞳方家貧兒癡但深藏五年不出門庭荒  
竈陞十日九不煬豈辦甘脆陳壺觴低頭包羞汗如漿  
老人此心久已忘一笑謂汝庸何傷人間榮耀豈可常  
惟有道義思無疆勉勵汝節彌堅剛某前再拜謝阿娘

自古作善天降祥但願年年似今日老萊母子俱徜徉

次張彥輔韻

風霜歲云徂塵事昧雙目故人書鼎來照眼一連玉把  
玩不知疲日宴坐空腹卷藏什襲秘寒光夜穿櫺嗟予  
骯髒姿十駕不能速丘壑聊自娛簞瓢亦云足君侯湖  
海士逸氣謝追逐胡為不予鄙乃肯顧林谷高軒緩前  
期清夢遶雙竹起將杜陵句寫寄玉川屋我窮詩未工  
最覺貂難續感君慙懃意吟苦屢更燭羣公繞藻思裂

賤動盈束歷險正推輶爭先俄擊轂低回欲引避悵望  
曷歸宿出叻竟無奇彊顏終自慙北風催歲年兩鬢失  
新綠樊生念學稼曹子悲食粟死灰寧復然寡過良所  
欲耿耿自知明何勞詹尹卜

次張彥輔賞梅韻

朔風萬里開雲屏清霜夜墜朝景晴南枝浩蕩正春色  
凍蘂的皪含空明花邊偶對青銅鏡槁項不堪冰雪映  
擁爐獨坐只悲吟振策出遊舒遠興暗香何處時一飄

行行復值最長條  
仰頭欲折渺誰贈  
滿意相思那得邀  
極知異縣淹行李  
心賞未甘輕付畀  
石雄賦罷不相聞  
秀野書來因舉似  
兩翁句法爭新奇  
畫出踈影沈寒漪  
幽探自出塵境外  
勝槩未許兒曹知  
祇今嚼蘂攀條處  
他日重來記前度  
風臺月觀悄無言  
玉笛冰灘索同賦  
嗟予衰懶倦將迎  
過眼紛紛無復情  
尚喜踈英窺水白  
更憐落片點苔青  
興來亂插飛蓬首  
擬向君家醉君酒  
酒酣耳熱莫狂歌  
布鼓雷門湏縮手



秀野以喜無多屋宇幸不礙雲山為韻賦詩某  
伏讀佳作率爾攀和韻劇思慳無復律呂笑覽  
之餘賜以斤斧幸甚

高人山水心結習自無始五畝江上園清陰遍桃李一

堂聊自娛三徑亦可喜試問避俗翁何如尊賢里

溫公獨樂

園在尊賢里

門前車馬客無非朝大夫問公獨何事中歲遽此圖長

安二三公髮白形枯臞隱憂念名節亦有此樂無

隱憂念名

節張大參  
疏中語

君侯嗜圖史，挿架何其多。徙居三十乘，流汗幾橐駝。千載誰晤語，端居自絃歌。至哉天下樂，歲月如子何。

西山一何高，雲氣出寒麓。中有無事人，鳴泉遶茅屋。宴坐今幾何，無以媚幽獨。興至偶成篇，呼兒為余讀。

我居深山中，茅舍破不補。上見風攪林，下有雲承宇。聞公落新宮，戶牖不可數。懶惰心力衰，念公亦良苦。

夜吟招隱詩，月落寒泉井。自非千載人，誰與共清景。散

髮心朗寥凝神味淵永功名起相期富貴非所幸

仙人空山居道意妙羣物度世君則然脩身吾豈不飛  
行仰雲路跌坐探理窟獨夜扣星壇清齋具簪笏

青山背夕陽茲景公所愛虛堂日落時遷坐一斛帶嵐  
分疑有處鳥度知無礙湏臾暮色來默默無與會

端居屏塵慮萬事付一尊客來語世故舉白當浮君超  
搖謝衆甫噂沓從諸孫何以自怡悅窓中見秋雲

清溪何迢迢上有千仞山中學仙侶白石為門闕丹

經苦吟哦至道窮躋攀豈知人間世風塵縈九寰

次李通韻贈范康侯

朝霜逼凋梅夕露忽團菊百年風雨過宜笑不宜哭  
川失自防心兵幾回觸年來見老大甘此跨下辱永謝  
五鼎烹聊寄一瓢足雖慙龍蟠泥肯羨鶩出谷適意超  
混茫放情遺結束俯仰天壤間靜勝惟我獨蒼蒼有心  
栢落落無瑕玉年紀尚無聞頭顱豈須卜

齋居感興二十首

余讀陳子昂感遇詩愛其詞旨幽邃音節豪  
宕非當世詞人所及如丹砂空青金膏水碧  
雖近乏世用而實物外難得自然之奇寶欲  
效其體作十數篇顧以思致平凡筆力萎弱  
竟不能就然亦恨其不精於理而自託僊佛  
之間以為高也齋居無事偶書所見得二十  
篇雖不能探索微渺追跡前言然皆切於日  
用之實故言亦近而易知既以自警且以貽

諸同志云

昆侖大無外旁薄下深廣陰陽無停機寒暑互來往皇  
犧古神聖妙契一俯仰不待窺馬圖人文已宜朗渾然  
一理貫昭晰非象罔珍重無極翁為我重指掌

吾觀陰陽化升降八紘中前瞻既無始後際那有終至  
理諒斯存萬世與今同誰言混沌死幻語驚盲聾

人心妙不測出入乘氣機凝冰亦焦火淵淪復天飛至  
人秉元化動靜體無違珠藏澤自媚玉韞山含暉神光

燭九垓玄思徹萬微塵編今寥落歎息將安歸

靜觀靈臺妙萬化此從出云胡自蕪穢反受衆形役厚  
味分朶頤妍姿坐傾國崩奔不自悟馳驚靡終畢君看  
穆天子萬里窮轍迹不有所招詩徐方御宸極

涇舟膠楚澤周綱已陵夷沉復王風降故宮黍離離玄  
聖作春秋哀傷實在茲祥麟一以跽反袂空漣洏漂淪  
又百年僭侯荷爵珪王章久已喪何復嗟歎為馬公述  
孔業託始有餘悲拳拳信忠厚無乃迷先幾

東京失其御刑臣弄天網西園植姦穢五族沈忠良青  
青千里草乘時起陸梁當塗轉凶悖炎精遂無光桓桓  
左將軍仗鉞西南疆伏龍一奮躍鳳雛亦飛翔祀漢配  
彼天出師驚四方天意竟莫回王圖不偏昌晉史自帝  
魏後賢盍更張世無魯連子千載徒悲傷

晉陽啓唐祚王明紹巢封垂統已如此繼體宜昏風塵  
聚瀆天倫牝晨司禍凶乾綱一以墜天樞遂崇崇淫毒  
穢宸極虐焰燔蒼穹向非狄張徒誰辦取日功云何歐



陽子秉筆迷至公唐經亂周紀凡例孰此容侃侃范太  
史受說伊川翁春秋二三策萬古開羣蒙

朱光徧炎宇微陰眇重淵寒威閉九野陽德昭窮泉文  
明昧謹獨昏迷有開先幾微諒難忽善端本綿綿掩身  
事齋戒及此防未然閉關息商旅絕彼桑道牽

微月墮西嶺爛然重星光明河斜未落斗柄低復昂感  
此南北極樞軸遙相當太一有常居仰瞻獨煌煌中天  
照四國三辰環侍旁人心要如此寂感無邊方

放勲始欽明南面亦恭已大哉精一傳萬世立人紀猗  
歟歎日躋穆穆歌敬止戒熒光武烈待旦起周禮恭惟  
千載心秋月照寒水魯叟何常師刪述存聖軌

吾聞包犧氏爰初闢乾坤乾行配天德坤布協地文仰  
觀玄渾周一息萬里奔俯察方儀靜隕然千古存悟彼  
立象意契此入德門勤行當不息敬守思彌敦

大易圖象隱詩書簡編訛禮樂矧交喪春秋魚魯多瑤  
琴室寶匣絃絕將如何興言理餘韻龍門有遺歌

程子  
晚居

龍門  
之南

顏生躬四勿曾子曰三省中庸首謹獨衣錦思尚絅偉哉鄒孟氏雄辯極馳騁操存一言要為爾挈裘領丹青著明法今古垂煥炳何事千載餘無人踐斯境

元亨播羣品利貞固靈根非誠諒無有五性實斯存世人逞私見鑒智道彌昏豈若林居子幽探萬化原

飄飄學仙侶遺世在雲山盜啟元命秘竊當生死闕金鼎蟠龍虎三年養神丹刀圭一入口白日生羽翰我欲

往從之脫屣諒非難但恐逆天道偷生詎能安

西方論綠業早早喻羣愚流傳世代久梯接凌空虛顧  
眄指心性名言超有無捷徑一以開靡然世爭趨號空  
不踐實蹟彼榛棘途誰哉繼三聖為我焚其書

聖人司教化黷序育羣材因心有明訓善端得深培天  
叙既昭陳人文亦塞開云何百代下學絕教養乖羣居  
競葩藻爭先冠倫魁淳風反淪喪擾擾胡為哉

童蒙貴養正孫弟乃其方雞鳴咸盥櫛問訊謹暄涼奉

水勤播灑擁篲周室堂進趨極虔恭退息常端莊劬書  
劇嗜炙見惡逾探湯庸言戒粗誕時行必安詳聖途雖  
云遠發軔且勿忙十五志於學及時起高翔

哀哉牛山木斤斧日相尋豈無萌蘖在牛羊復來侵恭  
惟皇上帝降此仁義心物欲互攻奪孤根孰能任反躬  
艮其背肅容正冠襟保養方自此何年秀穹林

玄天幽且默仲尼欲無言動植各生遂德容自清溫彼  
哉夸毗子咕躡徒啾喧但逞言辭好豈知神鑒昏曰余

昧前訓坐此枝葉繁發憤永刊落奇功収一原

卜居

卜居屏山下俯仰三十秋終然村墟近未愜心期幽近  
聞西山西深谷開平疇茅茨十數家清川可行舟風俗  
頗淳朴曠土非難求暫捐三徑資往遂一壑謀伐木南  
山巔結廬北山頭耕田東溪岸濯足西溪流朋來即共  
懽客去成孤遊靜有山水樂而無身世憂著書俟來哲  
補過希前修茲焉畢暮景何必營菟裘

奉陪機仲宗正景仁太史期會武夷而文叔茂  
實二友適自昭武來集相與汎舟九曲周覽巖  
壑之勝而還機仲景仁唱酬迭作謂僕亦不可  
以無言也衰病懶廢那復有此勉出數語以塞  
嘉貺不足為外人道也

此山名自西京傳丹臺紫府中天似聞雲鶴時降集  
應笑磨螳空回旋我來適此秋景晏青楓夜赤搖寒烟  
九還七返不易得千巖萬壑渠能專同遊幸有二三子

天昇此段非徒然梁郎李子山澤臞傳伯爰盜瀛洲仙  
相逢相得要彊附却恨馬腹勞長鞭黃華未和白雪句  
畫舸且共清泠川回船罷酒三太息百歲誰復來通泉  
景仁數日  
屢誦此句盈虛有數豈終極為君出此窮愁篇

讀機仲景仁別後詩語因及詩傳綱目復用前  
韻

道有點識無言傳向來誤矣空談天只今斷簡窺蠹蝕  
似向追蠡看蟲旋始知古人有妙處未遽秦谷隨飛烟



終然世界苦妨奪下帷發憤那容專一心正爾思鵲至

兩手欲救驚頭然書空且復罷咄咄屢舞豈暇陪仙

兩年罷詩止酒故云功名況乃身外事我馬碑兀甘回鞭解頤果

值得水井謂詩傳鑒古亦會朝宗川謂綱目兩公知我不罪

我便可築室分林泉十年燈下一夜語間日共賦春容  
篇

自上封登祝融峯絕頂次敬夫韻

衡嶽千仞起祝融一峰高羣山畏突兀奔走如曹逃我

來雪月中歷覽快所遭捫天滑青壁俯壑崩銀濤所恨  
無十牯一犂了六菴遙歸青蓮宮坐對白玉豪重閣一  
徙倚霜風利如刀平生山水心真作貨食饗明朝更清  
澈再往豈憚勞中宵撫世故劇如千蝟毛嬉遊亦何益  
歲月今滔滔起望東北雲茫然首空搔

遊密菴分韻賦詩得還字

我行得佳友勝日尋名山春山既妍秀清溪亦潺湲行  
行造禪扉小憩腰脚頑窮探意未已理策重躋攀入谷

翳蒙密俯澗隨泓灣誰將百尺綃掛此長林間雄聲殷  
地厚洪源瀉天慳偉哉奇特觀償此一日閒所恨境過  
清悄愴暮當還顧步三歎息人生何苦艱

彥集圭父擇之同飲白雲精舍以醉酒飽德為  
韻某分得飽字醉中走筆奉呈

奔趨名利場禍福急相絞夜窓一反側膚垢紛兩爪豈  
知親朋集晚食聊一飽心期共悠悠文字各稍稍華燭  
既屢更詩腸亦頻攪寒更儘渠深孤諷寧至卯

奉和公濟兄留周賓之句

丙申九日

端居感時序，駕言誰適從。  
聊攜二三子，杖屨此日同。  
悠哉素心人，宴坐空巖中。  
真成三秋別，夢想情何窮。  
行行陟崇岡，引脰希高風。  
忽然兩相值，俯仰迷西東。  
鱸堂偶休閒，鷄黍聊從容。  
不辭腰腳勞，共上西南峰。  
佩萸笑長房，把菊追陶公。  
遐觀衆山迴，一酌千慮融。  
興罷復來歸，杳靄秋堂空。  
窺樽訖餘瀝，倚閣聞疎鐘。  
主人意未闌，驪駒勿忽忽。

游百丈山以徙倚弄雲泉分韻賦詩得雲字

執熱倦煩跼駕言起宵分隨川踏曉月度嶺披朝雲攀  
緣白石梯拂拭蒼蘚紋噴薄驚快覲琮琤喜先聞奇哉  
此精廬眇然隔塵氛諸公肯同米定非俗子羣永日坐  
清樾短章策奇勲慨然念疇昔聯裾已荒墳中路忘磬  
折寸心謾絲棼惟慮泉石願三生有餘薰茲遊獲重尋  
十載心氤氲他年訪舊躅山靈莫移文

游廬峰分韻得盡字

蘆山一何高上上不可盡我行獨忘疲泉石有招引須  
臾出蒙密矯首眺無畛已謂極崢嶸仰視猶隱嶙新齋  
小休憩餘力更勉颺東峰切霄漢首夏正淒緊杖策同  
攀躋極目散幽窘萬里俯連環千重瞰孤隼因知平生  
懷未與塵慮泯歸塗采薇蕨晚餉雜蔬筍笑謂同來人  
此願天所允獨往會淹留寒棲甘菌蠢山阿子慕予無  
憂勒回軫

同邱子服游蘆峰以嶺上多白雲分韻賦詩得

白字

登巖出囂塵入谷媚泉石悠然愜幽趣不覺幾朝夕高  
尋倦冢頂舊賞歎陳迹仰慙仙人杖俯愧謝公屐昨日  
吾弟米勇往意無數今晨蓐食罷千仞一咫尺心期未  
究竟眼界已開闢浮野衆麓青縈雲兩川白湏臾互吞  
吐變化已今昔曠若塵慮空悲哉人境窄平生有孤念  
萬里思矯翮感此復沖然胡為尚形役

將游雲谷約同行者

躋險擇幽棲，寥蘿結茅屋。疏泉下石澗，種樹滿烟谷。時  
登北原上，一騁千里目。雲物下逶迤，岡巒遠重複。暫辭  
忽曠歲，再往恨牽俗。因悲昨游侶，或已在鬼錄。前年元  
履同游  
暄風悟新陽，一雨欣衆綠。明發君莫遲，幽期我當卜。

九月六日早發潭溪夜登雲谷翌日賦此

懷山不能寐，中宵命行軒。亭午息畏景，薄暮登危巒。峻  
極踰百磴，縈紆欲千盤。行行遂曛黑，月落天風寒。羽人  
候中塗，良朋集林端。問我何所迫，而嘗茲險艱。疲勞既



云極飢渴不能言投裝卧中丘幸此一室寬怒號竟永  
夕客枕無時安旦起闢幽戶竹樹青檀欒驚喜非昔觀  
披尋得新觀淹留十日期俯仰有餘歡寄語後來子勿  
辭行路難

雲谷次吳公濟韻

昔營此幽棲邈與世相絕誓將百年身來守固窮節心  
期苦未遂歲月一何闊終然匹夫志肯遽甘沒沒茲晨  
復登瞰目盡雲一抹激烈永嘯餘朗寥高韻發夫君內

德備不學王貽元觀心見參倚出世自英傑竭來肯顧  
我同去弄雲月微言得深扣大句亦孤拔多謝警疎慵  
未敢歎瞻忽更問豪釐間是同端是別

分韻得眠意二字賦醉石簡寂各一篇呈同遊  
諸兄

驅車何所適往至秋雲邊企彼澗中石舉觴酌飛泉懷  
哉千載人矯首辭世喧淒涼義熙後日醉向此眠仰視  
但清冥俯聽驚潺湲汲起坐三太息涕泗如奔川神馳北

關陰思屬東海孺丹衷竟莫展素節空復全低徊萬古  
情惻愴顏公篇為君結茅屋歲暮當來還

醉石

天秋山氣深日落林景翠亦知後騎迫且復一流憇環  
瞻峰列屏迴矚泉下淥永懷仙陸子久挹浮邱袂於今  
知幾載故宇日荒廢室餘醺壇石香火誰復繼更憐韋  
刺史五字有真意虎竹付歸人悲風起橫吹沈吟向絕  
迹浩蕩發幽寄來者知為誰念我儻三喟

簡寂

遊白鹿洞某得謝字賦呈元範伯起之才三兄

并示諸同遊者

歲月有環周窮臘忽受謝眷眷山水心幸此朱墨暇招呼得良友邂逅成夙駕深尋故轍迹喜見新結架永懷拾遺公藏器此待價橫流詩書澤下及楊李霸炎神撫興運制作流大化石室萬卷藏綸言九天下規模未云遠荒第良可詫自非賢邑宰誰復此精舍會當求勅賜畢願老耕稼更與盡心期臨流抗風榭

伏蒙秘閣張丈寵顧下邑并以長篇為貺降歎

之餘牽勉繼韻仰求斤削僭率皇恐

向來滅迹東山東閉門不問烏雌雄門前有路向塵土  
兩足未舉心先慵當時亦有車馬客此意欲說嗟誰同  
窮居聊復追仲蔚駕論何必須劉龔平生故人子張子  
相思安得長相從每勞書疏問生死坐想星宿羅心胸  
幾年持節漢水上木牛流馬旌旗紅君王輟饋思頗牧  
外庸且訖米朝宗因能過我紫霄下後乘載得珠簾櫳  
蒼顏白髮應笑我曷不飽卧陶窓風開樽鵞池水清激

下馬巖石烟空濛  
湏臾路轉山更好  
摩挲巨刃排雙峰  
少看銀河忽倒掛  
直欲跳下清冷中  
南臨匯澤共指點  
縹緲貝闕浮珠宮  
公言平日愛登覽  
到此一洗羣山空  
坐閒為我出奇句  
不用遠寄南飛鴻  
上言雲泉足奇賞  
下歎契闊歡相逢  
紛吾失脚墮世網  
乃有此會寧夫窮  
流光過眼驚昨夢  
舊約回首羞塵容  
明朝却上烟艇去  
滅沒萬頃追鳬翁

奉同尤延之提舉廬山雜詠十四篇

白鹿洞書院

在郡城東北十五里事見記文

昔人讀書地町疇白鹿場世道有升降茲焉更表章矧  
今中興年治具一以張絃歌獨不嗣山水無輝光荒榛  
適翦除聖謨已汪洋亦有皇華使肯來登此堂問俗良  
懇惻懷賢增慨慷雅歌有餘韻絕學何能忘

折桂院黃雲觀

在書院東北五里院後作亭取李白黃雲萬里動風色之句名

之

城中東北望五老何蒼蒼下有前朝寺一原頗深藏門

前林澗幽屋後雲木荒閒窓亦明潔著此瑞錦張有瑞房

香更能理枯筇步上林北岡仰視天宇闊俯瞰江流長

雲即黃觀受書彼何人姓字不足詳竹帛有遺臭桂樹徒芬

芳李逢吉嘗讀書此院去而登第以故得名

楞伽院李氏山房

在折桂西十里李公擇讀書處有東坡記文詩刻枯樹墨

跋

躡石循急澗穿林度重岡俛入幽谷窺仰見奇峰蒼李  
公英妙年讀書此雲房一去上臺閣致身何慨慷蘇公



記藏書文字有耿光餘事亦騷雅戲墨仍風霜兩公不  
歸米歲月忽已荒何用建遺烈寒泉薦孤芳

棲賢院三峽橋

在楞伽西五里

兩岸蒼壁對直下成斗絕一水從中來湧湑知幾折石  
梁據其會迎望遠明滅倏至走長蛟捷來翻素雪聲雄  
萬霹靂勢倒千巒嶮足掉不自持魂驚詎堪說老仙有  
妙句千古擅奇崛尚想化鶴來乘流弄明月

西澗清淨退菴

在棲賢西三里劉凝之舊隱  
作亭取黃太史詩語名之

凌兢度三峽窈窕復一原絕壁擁蒼翠奔流逝潺湲聞  
昔避世人寄此茅三間壯節未云遠高風杳難攀深尋  
得遺墟縛屋臨清灣坐睨寒木杪飛泉閱雲關茲遊非  
昔遊累解身復閒保此清淨退當歌不能諼

解印後與友生遊集

徘徊久之

卧龍菴武侯祠

在西澗西三里

空山龍卧處蒼峭神所鑿下有寒潭幽上有明河落我  
來愛佳名小築寄幽壑永念千載人丹心豈今昨英姿

儼繪事凜若九原作寒藻薦芳馨飛泉奉明酌公來識  
此意顧步慘不樂抱膝一長吟神交付冥漠

萬杉寺

在卧龍  
西十里

休沐聊命駕駕言何所之行尋慶雲寺想像昭陵時門  
前杉徃深屋後杉色竒空山歲年晚鬱鬱凌寒姿當年

雨露恩千載有餘滋匠石不敢睨孤標儼相持

寺前後  
杉萬本

皆天聖中植有  
旨禁翦伐者

更啟石室藏仰瞻天象垂願以清淨化

永為太平基

寺藏仁祖御飛  
白書有清淨字

開先漱玉亭

在萬杉西二里亭  
舊在橋上今廢

奇哉康山陽雙劍屹對起上有橫飛雲下有瀑布水崩  
騰復璀璨佳麗更雄偉勢從三梁外影落明湖裏平生  
兩仙句詠歎深仰止三年落星灣悵望眼空眯今朝隨  
杖屨得此弄清泚更誦玉虹篇塵襟諒昭洗

簡寂觀

在開先西五里  
陸修靜所居

高士昔遺世築室蒼崖陰真石壇峻煉藥古井深結  
交五柳翁屢賞無絃琴相攜白蓮渚一笑傾夙心晚歲

更市朝故山鎖雲岑柴車竟不返鸞鶴空遺音

修靜晚為宋明

帝召至建康卒於崇虛館

我來千載餘舊事不可尋四顧但絕壁苦

竹寒蕭慘

相傳竹是修靜手植其萌即所謂甜苦筍

歸宗寺

在簡寂西十里

金輪紫霄上寶界鸞溪邊往昔王內史願香有餘烟

相傳

寺是王右軍故宅

十年今一歸景物還依然澗水既蕩滴山花

亦清妍不辭原隰勞樂此賓從賢訪古共紆鬱勞農獨  
勤拳憐我非勝踐裂牋寄真詮逃禪公勿遽且畢區中

緣

是日某以事  
不得陪杖履

陶公醉石歸去米館

在歸宗  
西五里

予生千載後尚友千載前每尋高士傳獨歎淵明賢及  
此逢醉石謂言公所眠沉復巖壑古縹緲藏風烟仰看  
喬木陰俯聽橫飛泉景物自清絕優游可忘年結廬倚  
蒼峭舉觴酌潺湲臨風一長歎亂以歸米篇

溫湯

在醉石  
南二里

連山西南來中斷還崛起干霄幾千仞據地三百里飛

峰上靈秀衆壑下清美逮此勢力窮猶能出奇偉誰燃  
丹黃燄爨此玉池水客來爭解帶萬劫付一洗當年謝  
康樂絃絕今已矣水碧復流溫相思五湖裏

康樂湖中  
詩云水碧

輒流溫豈未  
見此水也耶

康王谷水簾

谷口景德觀在溫湯西十五  
里入谷又十五里至簾下

循山西北驚崎嶇幾經邱前行荒蹊斷豁見清溪流一  
涉臺殿古再涉川原幽縈紆復屢渡乃得寒巖陬飛泉  
天上來一落散不收披崖日璀璨噴壑風颼颼追新爨

絕品瀾茗澆窮愁敬酌古陸子何年復來遊

陸鴻漸茶經第此水

為天下第一

落星寺

在郡城南湖中

浩浩長江水東逝無停波及此一回薄湖平烟浪多孤  
嶼屹中川層臺起周阿晨望愛明滅夕游驚蕩磨極目  
青冥茫回瞻碧嵯峨不復車馬迹唯聞榜人歌我願辭  
世紛茲焉老漁蓑會有滄浪子鳴絃夜相過

山北紀行十二章章八句



祇役廬山陽矯首廬山陰雲峯不可覲碧澗何由尋昨

朝解印章結友同窺臨盡彼巖壑勝滿茲仁知心

子以閏月

二十七日罷郡是夕出城宿羅漢二十八日宿白鹿二十九日登黃雲觀度三峽窺玉淵憩西澗飲西原宿卧

龍四月一日過開先宿歸宗二日浴湯泉宿康王谷觀水簾宿景德觀三日與清江劉清之子澄永嘉張揚卿

清叟潯陽王阮南卿周頤龜父長樂林用中擇之洛陽趙希漢南紀會稽陳祖水慶長武當祁真卿師忠溫陵

吳無善仲達廬陵許子春景陽新安胡羊尹仲建安王朝春卿長樂余隅占之陳士直彥忠黃餘季直臨淮張

彥先致遠會稽僧志南明老俱行

窺臨事若何請從圓通說逶迤山

門路悄循修篁列溪仍侯家名屋是孱王設何救黍離

歌喟焉傷覆轍

國通寺地名侯溪本侯氏所居李後主取以為寺無他奇但門徑竹木深茂可

耳觀

行逢石門雨解驂寒澗東朝隲錦繡谷俯仰春冥

濛懸泉忽淙琤雜樹紛青紅屢憩小亭古幽探思無窮

石門澗正在天池山下有小菴三四是夕宿所謂廣福菴者未日登山道錦繡谷再過小橋橋皆有亭下又有

亭基二小亭一

竦身長林端策足層崖表仰瞻空界闊俯歎

塵寰小天池西嶽崙佛手東窈窕杖屨往復來憑軒瞰

歸鳥

盡錦繡谷登山稍高無復林木坡陀而上至天池院在小峯絕頂乃有石池泉水不竭東過佛手巖

石室嵌空中有井泉僧緣崖結架以居下臨錦繡谷又有石榻名遠公講經臺

斯須暮雲合

白日無餘暉金波從地湧寶燄穿林飛僧言自雄誇俗

駭無因依安知本地靈發見隨天機

天池院西數步有小佛閣下臨絕壑

是遊人請燈處僧云燈非禱不見是日不禱而光景明滅頃刻異狀諸生或疑其妄予謂僧言則妄而此光不可誣豈地氣之感而然耶 深尋兩林間清波貫華屋蓮社有遺踪

草堂非舊築脩廊餘故刻好醜雜珉玉亦復記經行深

慙後人讀

五山下至東西林兩寺相去不百步一溪清駛橫貫其間皆自方丈前廊廡下過他處

所無有也白蓮池在東林法堂前白公草堂基在寺東久廢近歲復創樓椽制殊狹陋然亦非其正處矣是日

題名屬寺僧刻於成通莊田記石

行軒復東鶩祠城當晚遊胡然冠

蓋集不盡心期幽夜厭百谷喧旦失千峯稠出門有遺

恨回首空綢繆

晚至太平興國宮唐九天使者祠也江州教授翁名卿載酒看與鄉人游應和

歐景文及其諸生二十餘人皆至

山水誠乃奇云誰究終始曇遠亦

何人神君豈其鬼東西妄采獲誣諂共恢詭百世踵謬

訛龔倫日頽圯

東林慧遠雜取孔老之言以附佛學當著沙門不敬王者論唐明皇自言親見

使者降於殷庭因立此宮而羣臣造為妖妄以迎合者甚衆本朝仍賜宮額神號置提舉官云

以茲

遊覽富翻令懷抱傷誰哉可告語舉俗昏且狂乾坤有

真心日月垂休光茫茫宇宙內此柄熟主張北度石

塘橋西訪瀛溪宅喬木無遺株虛堂惟四壁竦瞻德容

晬跪薦寒流碧幸矣有斯人渾淪再開闢平生勞仰

止今日登此堂願以圖象意質之中几傍先生寂無言

賤子涕泗滂神聽儻不遺惠我思無疆六日拜瀛溪先生書堂遺象子

澄請為諸生說太極圖義先生之曾孫正卿彥卿玄孫濤為設食於光風霽月之亭明晨江磯

寺尊酒聊對設孰是十日遊遽成千里別英僚樹嘉政

素友厲孤節努力莫相忘清宵共明月七日薛洪特志王仲傑之才攜

酒自南康來飲罷與張陳趙南還軍子澄許張歸廬陵而卿龜父還家擇之之湖南予與王余陳黃東度湖口

歸而

臘月九日晚發懷安公父教授壽翁知丞載酒  
為別而元禮景嵩子木擇之廷老考叔舜民諸  
賢相與同舟乘便風頃刻數十里江空月明飲  
酒樂甚因以星垂平野闊月湧大江流分韻某  
得星字醉中別去乃得數語略紀一時之勝云

掛帆望烟渚整棹別津亭風水已云便我行安得停離

樽枉羣賢濁醪愧先傾

二公厨船未至  
先飲舟中餘尊

談笑不知遠但

覺江流清

江水上游接建劍溪潮所不及水益清駛

獵獵甘蔗洲茫茫白沙

汀斯須復回首祇有遙山青

甘蔗白沙兩地名相去十許里頃刻而過

野色

一以瞋川光晶孤明中流漾華月極浦涵疎星酒酣客散歸茫然獨宵征起視天宇闊此身一浮萍難追五湖遊未願三閤醒且詠招隱作孤舟轉鈴舩

行視武夷精舍作

神山九折溪公沂此中半水深波浪闊浮綠春渙渙

武夷

溪凡九曲多急流亂石此第五曲水特深闊平緩綠漪可愛

上有蒼石屏百仞聳雄

觀嶺巖露垠窅突兀倚霄漢

此峰夷上削下拔地峭立如方屋帽按舊圖名大隱

屏淺麓下縈迴深林久叢灌胡然閔千載逮此開一旦

峰下小山重複中有平地數十丈喬木長藤茂林脩竹交相蔽隱舊無人迹乾道己丑予舟過而樂之及今始能卜築以我乘新村船輟棹青草岸榛莽喜誅鉏面勢

窮考校居然一環堵妙處豈輪奐左右矗竒峰躊躇極

佳翫

方經始時予以病不能米至是送別山西始自新村買舟以來視所縛屋三間制度殊草草然背負

大隱屏面直溪南大山左有魏王上是時芳節闌紅綠

昇峰右有鍾模三教等石極為雄勝紛有爛好鳥時一鳴王孫遠相喚山多獼猴暫遊意已愜獨



往身猶絆珍重舍瑟人重來足幽伴

已約初夏與同  
志皆往遊集

武夷精舍雜詠

并序

武夷之溪東流凡九曲而第五曲為最深蓋  
其山自北而南者至此而盡聳全石為一峰  
拔地千尺上下平處微戴土生林木極蒼翠  
可翫而四隕稍下則反削而入如方屋帽者  
舊經所謂大隱屏也屏下兩麓坡院旁引還  
復相抱抱中地平廣數畝抱外溪水隨山勢

從西北米四屈折始過其南乃復遶山東北  
流亦四屈折而出溪流兩旁丹崖翠壁林立  
環擁神剎鬼刻不可名狀舟行上下者方左  
右顧瞻錯愕之不暇而忽得平岡長阜蒼藤  
茂木按衍迤靡膠葛蒙翳使人心目曠然以  
舒窈然以深若不可極者即精舍之所在也  
直屏下兩麓相抱之中西南向為屋三間者  
仁智堂也堂左右兩室左曰隱求以待棲息

右曰止宿以延賓友左麓之外復前引而右  
抱中又自為一塢因累石以門之而命曰石  
門之塢別為屋其中以俟學者之羣居而取  
學記相觀而善之義命之曰觀善之齋石門  
之西少南又為屋以居道流取道書真誥中  
語命之曰寒棲之館直觀善前山之顛為亭  
回望大隱屏最正且盡取杜子美詩語名以  
晚對其東出山背臨溪水因故基為亭取胡

公語名以鐵笛說具本詩注中寒棲之外乃  
植援列樊以斷兩麓之口掩以柴扉而以武  
夷精舍之扁揭焉經始於淳熙癸卯之春其  
夏四月既望堂成而始來居之四方士友來  
者亦甚衆莫不歎其佳勝而恨他屋之未具  
不可以久留也釣磯茶竈皆在大隱屏西磯  
石上平在溪北岸竈在溪中流巨石屹然可  
環坐八九人四面皆深水當中科曰自然如

竈可爨以瀹茗凡溪水九曲左右皆石壁無  
側足之徑唯南山之南有蹊焉而精舍乃在  
溪北以故凡出入乎此者非魚艇不濟總之  
為賦小詩十有二篇以紀其實若夫晦明昏  
旦之異候風烟草木之殊態以至於人物之  
相羊猿鳥之吟嘯則有一日之間恍惚萬變  
而不可窮者同好之士其尚有以發於予所  
欲言而不及者乎哉

精舍

琴書四十年幾作山中客一日茅棟成居然我泉石

仁智堂

我暫仁智心偶自愛山水蒼崖無古今碧澗日千里

隱求齋

晨窓林影開夜枕山泉響隱去復何求無言道心長

止宿寮

故人肯相尋共寄一茅宇山水為留行無勞具鷄黍

石門塢

朝開雲氣擁暮掩薜蘿深自笑晨門者那知孔氏心

觀善齋

負笈何方來今朝此同席日用無餘功相看俱努力

寒栖館

竹間彼何人抱甕靡遺力遙夜更不眠焚香坐看壁

晚對亭

倚筇南山巔卻立有晚對蒼峭矗寒空落日明影翠

鐵笛亭

山前舊有奪秀亭故侍郎胡公明仲嘗與山之隱者劉君無道游涉而賦詩焉

劉少豪勇游俠使氣晚更晦迹自放山水之間善吹鐵笛有穿雲裂石之聲胡公詩有更煩橫

鐵笛吹與衆仙聽之句亭既廢久一日與客及道士數人尋其故址適有笛聲發於林外悲狀

回鬱巖石昏震追感舊事因復作亭以識其處仍改今名

何人轟鐵笛噴薄兩崖開千載留餘響猶疑笙鶴來

釣磯

削成蒼石稜倒景寒潭碧永日靜垂竿茲心竟誰識

茶竈



仙翁遺石竈宛在水中央飲罷方舟去茶烟裊細香

漁艇

出載長烟重歸裝片月輕千巖猿鶴友愁絕棹歌聲

鉛山立春六言二首

雪擁山腰洞口春回楚尾吳頭欲問閩天何處明朝嶺  
水南流

行盡風林雪徑依然水館山村却是春風有脚今朝先  
到柴門

讀十二辰詩卷掇其餘作此聊奉一笑

夜聞空簾齧飢鼠曉駕羸牛耕廢圃時才虎園聽豪夸  
舊業兎園嗟莽鹵君看蟄龍卧三冬頭角不與蛇爭雄  
毀車殺馬罷馳逐烹羊沽酒聊從容手種猴桃垂架綠  
養得鷓鴣雞鳴角角客米犬吠催煮茶不用東家買猪肉

律詩

贈仰上人

澗谷秋雲曉飄颻無定姿氛氲升遠樹淩亂起寒颼雨

罷成孤鶴天高逐散絲上人歸別嶺心迹但如斯

喜晴

衝飈動高柳淥水澹微波日照秋空靜雨餘寒草多放  
懷遺簿領發興託煙蘿忽念故園日東阡時一過

夢山中故人

風雨瀟瀟已送愁不堪懷抱更離憂故人只在千巖裏  
桂樹無端一夜秋把袖追歡勞夢寐舉杯相屬暫綢繆  
覺來却是天涯客簷響潺潺瀉未休

次韻傅丈題呂少衛教授藏書閣

西樓誰與共閒居茂樹婆娑清晝餘  
大隱祇今同一壑行吟非昔似三閭  
揣摩心事惟黃卷料理家傳亦素書  
更鑿寒泉供漱石世紛不擬問焉如

去歲蒙學古分惠蘭花清賞既歇復以根叢歸  
之故畹而學古預有今歲之約近聞頗已著花  
輒賦小詩以尋前約幸一笑

秋蘭遞初馥芳意滿沖襟想子空齋裏淒涼楚客心夕

風生遠思晨露灑中林頗憶孤根在幽期得重尋

梵天觀雨

持身乏古節寸祿久棲遲暫寄靈山寺空吟招隱詩讀  
書清磬外看雨暮鐘時漸喜涼秋近滄州去有期

登閣

橫空敞新閣高處絕炎氛野迴長風入天秋涼氣分憑  
欄生逸想投迹遠人羣終憶茅簷外空山多白雲

和劉抱一

幾年牢落舊村墟  
此日悠然水竹居  
病起試尋春逕草  
客來聊煮雪畦蔬  
開樽細說平生事  
信手同繙集古書  
適意何勞一千卷  
新詩閒出笑談餘

再和

久矣投裝返舊墟  
不將心事賦閑居  
荷鋤帶月朝治穢  
植杖臨風夕挽蔬  
三徑猶尋陶令宅  
萬籤聊借鄴侯書  
木瓜更得瓊琚報  
吟咏從今樂有餘

送芮國器二首

拄節千山外，勤勞飽所經。  
一心無適莫，萬口自丹青。  
拂拭先賢傳，光輝處士星。  
活人功更遠，試與問林垌。  
紫陌同年舊，青雲得路新。  
論心端有契，下榻豈辭頻。  
別驚如許相逢渺，未因期公念經濟。  
從此上星辰。

梅花開盡不及吟，賞感歎成詩。  
聊貽同好二首。  
憶昔身無事，尋梅只怕遲。  
沉吟窺老樹，取次折橫枝。  
絕艷驚衰鬢，餘芳入小詩。  
今年何草草，政爾負幽期。

渠几冰壺在，梅梢雪蕊空。  
不堪三弄咽，誰與一樽同。  
鼻

觀殘香裏心期昨夢中那知北枝北猶有未開叢

仁術

在昔賢君子存心每欲仁求端從有術及物豈無因惻  
隱來何自虛明覺處真擴充從此念福澤遍斯民入井  
倉皇際牽牛觥觥辰向米看楚越今日備吾身

聞善決江河

大舜深山日靈襟保太和一言分善利萬里決江河可  
欲非由外惟聰不在他勇如爭赴壑進宜待盈科學海



功難並防川患益多何人親祖述耳順肯同波

感事書懷十六韻

戎馬何年盛神州遂陸沉翠華棲浙右紫塞僅淮陰志  
士憂虞切朝家豫備深一朝頒細札三捷便聞音投鉞  
無遺算沈機識聖心東西兵合勢南北怨重尋小却奇  
還勝窮凶禍所臨旃裘方舞雪血刃已披襟殘類隨燬  
燼遺黎脫斧礚戴商仍夙昔思漢劇謳吟共惜山河固  
同嗟歲月侵泉著久憔悴陵栢幸蕭慘正爾資羣策何

妨試盍簪折衝須舊哀出牧仗南金衆志非難徇天休  
詎可謚故人司獻納早晚奉良箴

伏讀二劉公瑞巖留題感事興懷至於隕涕追  
次元韻偶成二篇

誰將健筆寫崖陰想見當年抱膝吟緩帶輕裘成昨夢  
遺風餘烈到如今西山爽氣看猶在北闕精誠直自深  
故壘近聞新破竹起公無路祗傷心

右懷實學公作近  
聞西兵進取閬峽

其帥即公  
舊部曲也

投紱歸來卧赤城家山無處不經行寒巖解榻夢應好  
絕壁題詩語太清陳迹一朝成寂寞靈臺千古自虛明  
傳來舊業荒蕪盡慙愧秋原宿草生

右懷病翁先生作  
翁領崇道祠官故

有赤城  
之句

### 壽母生朝三首

昨夜秋風涼氣歸今朝喜色動簾帟細斟歛灑新春酒  
戲舞斑斕舊綵衣願上龜蓮千歲壽永令鳬藻一家肥  
也知厚德天應報更說陰功世所稀

暑退秋容欲凜然北堂佳氣倍澄鮮舊病已向新涼失  
壽骨應隨爽籟堅塵外光陰那有盡尊前風月浩無邊  
癡兒六六今如許慚愧西河不老仙

仙人昔住紫琳房一旦翩然下大荒久悟客塵無自性  
故應福祿未渠央徙居邂逅成嘉邈捧檄因循愧漫郎  
願借寒潭千丈碧年年此日奉華觴

秀野

為憐蘅芷滿芳洲特地臨江賦遠遊十畝何妨自春色

萬緣從此付東流  
靜看朝市真兒戲  
須信田園是老謀  
出處知公有餘裕  
未應辛苦謝靈邱

曲池軒

去年種竹長新篁  
今歲穿渠過野塘  
自喜軒窓無俗韻  
亦知草木有真香  
林間急雨生愁思  
水面微風度晚涼  
却厭端居苦無事  
凭闌閒理釣絲長

前村

題下恐當  
有梅字

玉立寒煙寂寞濱  
仙姿瀟灑淨無塵  
千林搖落今如許

一樹橫斜獨可人，真與雪霜娛晚景。  
任從桃柳殿殘春，綠陰青子明年事。  
衆口驚嗟鼎未新。

次秀野韻五首

史君簾閣對脩筠，起看名園雨後春。  
便賦新詩留野客，更傾芳酒酌花神。  
未酬管樂平生志，且作羲皇向上人。  
祇恐功名相迫逐，不容老子卧漳濱。

滿園紅紫已爭新，百轉幽禽亦喚人。  
蠟屐未妨泥步穩，珍叢終恨雨來頻。  
卧看晚色忻初霽，起約良遊醉好春。

却笑當年金谷燕相隨僕僕望車塵

惆悵春餘幾日光從今風雨莫顛狂急呼我輩穿花去  
未覺詩情與道妨蘿帶不須吟杜若角弓聊復賦甘棠  
淋浪坐客休辭醉飲罷睇身向九陽

知君久矣厭喧卑造物尊前喚小兒一醕未應我側弁  
十分聊爾快翻卮治中寂寞凝塵日令尹憂勞退食時  
正好相尋發孤笑莫教牢落負心期

當年共翦北山萊脩竹成陰手自我書卷莫教春色老

荆荆肯為俗人開  
公能顧我傳新句  
我欲留公撥舊醅  
悵望南園芳樹底  
明年應放小車來

留秀野留丈二首

好雨當春過一犁  
我公遠憶故園西  
孤篷穩轉清灘急  
十里行穿綠樹齊  
路熟已欣經霧市  
身輕未怕躡雲梯  
諸孫剩欲留公住  
細和新詩句指迷

一去屏山今幾春  
歸來三逕但荒榛  
翦除便覺風煙好  
徙倚還驚物色新  
樓外千林遮去路  
階前一水繼行塵



勸君更作留連計同社追遊苦未頻

又和秀野二首

愁陰一夜轉和風曉看花枝露彩濃  
覓句休教長閉戶出門聊得試扶筇  
物華始信如詩好春色方知似酒醲  
多謝隣翁笑相迓為言晴暖更過從

江臯晴日麗芳華翠竹疎疎映白沙  
路轉忽逢沽酒客眼明惟見滿園花  
望中景助詩人趣物外春歸釋子家  
向晚却尋芳草逕夕陽流水遶村斜

次秀野詠雪韻

開門驚怪雪交加，亂落橫飛詎有涯。  
密竹不妨呈勁節，早梅何處覓殘花。  
山陰客子須乘興，洛下先生想卧家。  
病廢五觴寒至骨，哦詩無復更豪誇。

次秀野暑中二首

劇暑悲難度，清秋喜却回。  
病隨庚伏盡，尊向晚涼開。  
臨水看雲去，鉤簾待月來。  
勝游驚昨夢，曾上鬱蕭臺。

某新自雲

谷還家

絕境人難到唯堪樂此身泉吟青玉峽風度白綸巾獨

往寧無意長閒未有因雲山天賜履吾道豈全貧

雲谷絕頂

四望雲山  
環數百里

### 栗熟

樹雜椅桐繼國風莫教林下長蒿蓬

種樹法栗下不得有草木

共期

秋實充腸飽不羨春華轉眼空病起數升傳藥錄

本草云人

有脚弱往栗樹下啖  
及數升遂能起行

晨興三燕學仙翁

蘇黃門詩云老  
去自添腰脚病

仙翁服栗舊傳方客米為說  
晨興晚三燕徐收白玉漿

櫻桃浪得銀絲薦一笑纔

金少已入  
堪發面紅

銀絲見杜詩本草云櫻桃服之令人美顏色

卷六十六

### 山藥

怪來朽壤耀瓊英  
小斲頌筐可代耕  
豢豹於人儘無分  
蹲鴟從此不須生  
雪鏡但使身長健  
石鼎何妨手自烹  
欲賦玉延無好語  
羞論蜂蜜與羊羹

陳蘭齋玉延賦有蜂蜜羊羹之句

### 假山焚香作烟雲掬水為瀑布二首

平地俄驚紫翠堆  
便應題作小飛來  
爐熏細度巖姿出  
綫溜遙分壁色開  
獨往但憑南郭几  
遠遊休翦北山萊

人言造化無私力珍重仙翁挽得回

一簣工夫莫坐談便教庭際湧千巖眼中水石今成趣  
物外烟霞舊所耽泉細寒聲生夜壑香銷暝靄變晴嵐  
兒童也識幽棲地共指南山更近南

櫛榔

憶昔南遊日初嘗面發紅藥囊知有用茗盃詎能同蠲  
疾收殊效修真錄異功三彭如不避糜爛七非中

本草云櫛

榔救三蟲柳子罵尸蟲云擊汝鄴都糜爛  
縱橫七非見真誥鄴都者六天之一也

仲績尊兄對策南宮相顧田舍輒賦小詩攀餞  
行李

三徑荒涼獨掩門故人車馬過相存  
長安此去無千里  
濁酒何妨盡一尊  
共說淵源非曩日  
好披肝膽奉明恩  
不辭妄竊仁人號  
執手臨歧敢贈言

送謝周輔入廣

夫君壯節與竒謀  
屈首微官世所羞  
攬轡未妨聊矍鑠  
賦詩直為寫離憂  
蒼茫嶺海三年別  
珍重親朋幾日留

滿意分携一杯酒登山臨水不能休

鷺湖寺和陸子壽

德義風流夙所欽別離三載更關心偶扶藜杖出寒谷  
又枉籃輿度遠岑舊學商量加邃密新知培養轉深沉  
却愁說到無言處不信人間有古今

登定王臺

寂寞番君後光華帝子來千年餘故國萬事只空臺日  
月東西見湖山表裏開從知爽鳩樂莫作雍門哀

登祝融峰用擇之韻

今年緣底事浪走太無端直以心期遠非貪眼界寬雲  
山於此盡風袂不勝寒孤鳥知人意茫茫去不還

贈上封諸老

夜宿上封寺翛然塵慮清月明殘雪裏泉溜隔窓聲楮  
衲今如許綈袍那復情爐紅虛室暖聊得話平生

胡丈廣仲與范伯崇自嶽市米同登絕頂舉酒

極談得聞比日講論之樂



我已中峰住君從何處來  
莫留巖底寺徑上月邊臺  
濁酒團樂坐高談次第開  
前賢渺安在清酌寄餘哀

十六日下山各賦一篇仍迭和韻

絕頂米還晚寒窓睡達明  
連床渺歸思三宿悵餘情  
雲合山無路風回雪有聲  
嶽祇珍重意只此是將迎

十一月二十六日宿萍鄉西三十餘里黃花渡  
口客舍稍明潔有宋亭伯題詩亦頗不俗因錄  
而和之

鼎足爐邊坐陶然共一樽道心元自勝世味不須論安  
穩三更睡清明一氣存雖無康樂句聊爾慰營魂

道閒厭苦泥淖思亟還家安坐講習用擇之韻  
呈二賢友

客路泥塗正所憂可堪雲物更油油向米結友輕千里  
此去還家且一邱妙處自應從我得躬行肯使歎吾猶  
兩賢定許相提挈厚意何勝雜珮酬

安仁曉行

夙駕安仁道行行得自娛荒山園野闊遠樹出林孤景  
晦長烟合天寒碧草枯歸心懷往路極目向平蕪

十七日早霜晴觀日出霧中喜而成詩

斜月夜窓白肅霜朝氣清長塗披素錦寒霧湧金鉦已  
作三冬雨何妨十日晴天公且相念莫遣暮雲生

再用前韻

久陰冬竟暖欲霽氣先清田舍占烟火軍家候鼓鉦風  
霜千里肅天地一朝晴明日知何日陽春又發生

次韻擇之章巖

驅馬倦長道投鞭憩此巖  
來應六鼇戴跡是五丁劉  
泉脈流青潤林梢擁碧巉  
老禪深閉戶容子且征衫

次韻別林擇之

暫時相別不須悲  
楚調淒涼政爾為幾曲清溪足相送  
一天明月豈曾離上堂嘉慶多為問  
緣道風光少賦詩  
更謝同袍二三子夜來幽夢滿春池

九日登天湖以菊花須插滿頭歸分韻賦詩得

歸字

去歲瀟湘重九時滿城寒雨客思歸故山此日還佳節  
黃菊清樽更晚暉短髮無多休落帽長風不斷且吹衣  
相看下視人寰小祇合從今老翠微

春雪用韓昌黎韻同彭應之作

既有陽春曲那無白雪謠連天飛不斷著地暖還銷未  
掩高入戶難齊衲子腰稍開銀世界漸長玉枝條興盡  
愁烟艇行迷認野橋酒腸渾欲凍吟筆為誰搖殘臘成

三白餘寒又一朝香隨梅藥落輕伴柳花飄神女羞捐  
珮鮫人敢獻綃東皇應好事避舍亦相饒

飲清湍亭石上小醉再登晝寒

水邊今日共傳杯多謝殷勤數子來三伏炎蒸那有此  
百年懷抱頓能開雲山合匝還生霧雪澗崩騰怒吼雷  
却恨蒼屏遮遠目凌風直欲跨蓬萊

雲谷合記事目效俳體戲作三詩寄季通

雲關須早築基趾要堅牢栽竹行教密穿池岸欲高乘

春移菡萏帶雪覓蕭樛

謂杉桎也

更向關門外疏泉斬亂

蒿

堂成今六載上雨復旁風逐急添茅蓋連忙畢土功

謂柱

下貼磚

桂林何日秀蘭逕幾時通并築雙臺子東山接水

筒

莊舍宜先立山楹却漸營泉疏藥圃潤堰起石池清早  
印荒田契仍標別戶名想應頻檢校祗恐欠方兄

彥集奉檄歸省示及佳篇次韻奉酬呈諸兄友

游子思親久聚糧不堪官裏簿書忙平生況少鷹鷂意  
此日尤慙時世粧臘雪未消歡奉檄春風初轉喜還鄉  
上堂嘉慶從容問一醕何妨累十觴

彥集兄再適臨汀惠顧蓬華賦詩留別眷予良  
勤次韻祖行言不盡意

勝喜君才老更成伊優叢裏見孤撐官身未免心徒壯  
親膝頻違淚欲橫簿領不嫌春筍束應聲要比玉壺清  
枉車投翰殷勤甚安得仁言與贈行



圭父為彥集置酒白蓮沼上彥集有詩因次其  
韻呈坐上諸友

大阮歸來客滿堂更移芳席近回塘共憐的皪水花淨  
并倚離披風蓋涼銀筆看題青玉案佳人悵望碧雲鄉  
此情此景真愁絕病著無因為舉觴

次韻題平父兄重建一枝堂

盡戟朱門枕碧山貂蟬元自出儒冠更餘此日林間樂  
遠繼當年膝下歡命駕賓朋千里近放懷琴酒百憂寬

遺編却好傳孫子莫遣因循學宴安

日用自警示平父

圓融無際大無餘即此身心是太虛不向用時勤猛省  
却於何處味真腴尋常應對尤須謹造次施為更莫疎  
一日洞然無別體方知不枉費工夫

寄雲谷瑞泉菴主

憶昔誅茅日山房我自名風埃猶俗累烟雨負巖耕多  
謝空門侶能同物外情肯來分半壑聊爾度平生少待

清秋日閒尋遠嶽盟不知誰是客一笑絕塵纓

白鹿講會次卜丈韻

宮牆蕪沒幾經年祇有寒烟鎖澗泉結屋幸容追舊觀

題名未許續遺編

請為洞主不報

青雲白石聊同趣

謂西澗劉公

霽

月光風更別傳

謂瀛溪夫子

珍重箇中無限樂諸郎莫苦羨

騰騫

送四十叔父

吾家從昔號清門叔父於今道更尊客米艱難空自惜

遺經終始向誰論  
獨尋雲嶠逢孤姪  
共愛春江接故園  
細說刈葵休放手  
此來真不為盤飧

和張彥輔初到南康之句

十年不共賦陽春  
正有胸中萬斛塵  
失喜清詩還入手  
細看佳句轉驚人  
知公近覺青山好  
顧我頻嗟白髮新  
肯過寒齋共尊酒  
向來心事請深陳

次張彥輔西原之作

無處堪投跡  
空山寄一椽  
懸門窺絕壁  
繚徑上層巔  
檻

閣吞江浪窓虛響谷泉丹經閒自讀不為學神仙

次張彥輔卧龍之作

瀑水源何處高疑雲漢通瀉時垂練直落處古潭空  
寄詩能好龍蟠意自雄知君來峴首為我說隆中

和張彥輔雪後棲賢之作

夜來春雪遍林丘却喜風威曉便收好上籃輿閒縱目  
莫將衲被苦蒙頭微官正愧逍遙社勝日猶堪汗漫遊  
欲出林闕戀瑤草不妨尊酒更淹留

贈于盛二生

昔日豐城劒寒光射斗牛江山餘秀傑人物尚風流二  
妙今安匹孤帆各倦游還家問師友折節慕前修

和戴主簿韻

平生本自好樓居況接高人永晝餘共喜江山入尊俎  
從教幕府省文書感君肯出新詩句恨我終思舊草廬  
擬借韋編訂龍馬免推納甲話蟾蜍

戴嘗有麻衣易說  
自以為得之異人

云

游密菴分韻賦詩得清字

誤落塵中歲序驚，歸來猶幸此身輕。  
便將舊友尋山去，更喜新詩取意成。  
暖翠乍看渾欲滴，寒流重聽不勝清。  
箇中有趣無人會，琴罷尊空月四更。

遊密菴得空字

欲覓仙洲路，須乘萬里風。  
飲泉雲出岫，卧嶺月流空。  
永夜渾無寐，悲歌莫與同。  
起來殘樹影，清絕小樓東。

次韻寄題萬頃寒光奉呈休齋先生

閒將歲月老烟汀更遣詩情到杳冥遊子故應悲舊國  
壯懷那肯泣新亭一官避世今頭白萬卷收功久汗青  
但見潮生與潮落不知沈醉又還醒

伏承侍郎使君垂示所與少傅國公唱酬西湖  
佳句謹次高韻聊發一笑二首

百年地闢有奇功創見猶驚鶴髮翁共喜安車迎國老  
更傳佳句走郵童閒來且看潮頭入樂事寧憂酒觥空  
會見台星與卿月交光齊照廣寒宮



越王城下水融融此樂從今與衆同  
滿眼芰荷方永日  
轉頭禾黍便西風  
湖光盡處天容闊  
潮信來時海氣通  
酬唱不誇風物好  
一心憂國願年豐

伏讀致政少傅相公送趙成都佳句兩篇不勝  
慰幸已次高韻并餞其行而再賦此章以見區  
區瞻仰之意繕錄拜呈伏乞采覽二首

歸來寂寞卧漳濱  
夢想威容阻再親  
綠野遙聞花欲語  
赤書還喜雁來賓  
間中有句人爭誦  
妙處無心物自春

行馬不因吾輩設胸奇猶得話陳陳

一旦高辭將相權身名從此慶雙全人誇迹已風塵外  
誰道心遊日月邊未許前賢專晚節更將餘事發春妍  
君王若要詢黃髮便好臨雍促肆筵

三月晦日與諸兄為真率之約徘徊石馬晚集  
保福偶成短句奉呈聊發一笑

春服明朝換晴川漲綠陰追隨昏勝侶邂逅即初心社  
蹟莓苔古禪扉竹樹深移尊真惜日畢景共披襟儉德

尊賢範哇詞愧雅音清和應更好逸想寄雲岑

是日約後會為

仙洲之遊

伏蒙致政少傅相公寵賜寄題武夷精舍詩一首拜受捧讀不勝仰歎無以自見區區感幸之誠輒繼高韻繕寫拜呈冒瀆威尊下情恐悚之至

望斷鈞天白玉都石田茅屋詎應無況蒙一字榮褒袞  
便覺千峰勝畫圖舊弼詩情高綠野狂奴心事只風雩

蒲輪幾日符嘉夢恰有流霞酒一壺

舊弼公所居坊名取答詔語也某近

嘗夢公趣召枉臨止飲留宿翼日登車手取几間活人書一帙以行憲者公當再施醫國之手以活斯人乎李

義山武夷詩有流霞酒一杯之句

### 送建陽陳丞伯厚還鄉

枯蒼雲壑入秋夢  
閩嶺風霜侵鬢絲  
歲晚未收稽古力  
徑荒曾擬賦歸辭  
一官坎壈嗟丞負  
百歲歡榮慶母慈  
去步逶迤無愠色  
此心惟有古人知

### 擬縣補以蟲鳴秋詩

天籟誰為主乘時各自鳴如分百蟲響來助九秋清未  
歇吟風調先催泣露聲乾坤闢氛氣草木斂華英易斷  
愁人夢難安懶婦驚唯應廣成子萬感不關情

古語云  
絡緯鳴

懶婦驚  
見詩疏

聚星落成致政陳丈舉酒屬客出示新詩而仲  
卿朝瑞及劉范二兄相與繼作某幸以卜鄰得  
陪勝集率爾次韻聊發一笑

適親德範仰循循遽喜名章肆筆成賸說臺高今勝昔

極知星聚暗還明  
當家翰藻爭春麗  
上客詞源徹底清  
更共鄰翁閒指點  
千峰環合水無聲

懷潭溪舊居

憶住潭溪四十年  
好峰無數列窓前  
雖非水抱山環地  
却是冬溫夏冷天  
遶舍扶疎千箇竹  
傍崖寒冽一泓泉  
誰教失計東遷謬  
偃卧西窓日滿川

孝宗皇帝挽歌詞

阜陵發引詔許近臣進挽歌  
辭某恭惟盛德

大業不易形容方將攄竭鄙思以效萬一冥  
搜連日纔得四語而忽被閑勞之詔罷遣東  
歸遂不敢成章以進杜門累年每竊私恨戊  
午之春大病瀕死默念平生仰孤恩遇無路  
補報感激涕泗不能自己謹因舊篇續成十  
有六韻略敘本末以見孤臣亡狀死不忘君  
之意云

精一傳心妙文明撫運昌乾坤歸獨御日月要重光不

值亡秦歲何由復漢疆遽移丹極仗便上白雲鄉九有  
哀同切孤臣淚特滂詎因逢舜日曾得廁周行但憶彤  
墀引頻趨黼坐旁哀華叨假寵縞素識通喪似有鹽梅  
契還嗟貝錦傷戴盆驚委照增秩待行香手疏攄丹悃  
衡程發阜囊神心應斗轉巽令亟風揚未荅隆儒厚俄  
聞脫蹀忙此生知永已沒世恨空長內難開新主遄歸  
立右廂因山方慘澹去國又愴惶疾病今如許形骸可  
自量報恩寧復日忍死續殘章



引年得請伏蒙致政學士契丈特垂慶問寵以  
佳篇捧玩之餘感愧亡量輒借高韻少見謝誠  
伏幸笑鑑

一氣無私物自槃放臣偏荷主恩寬方慙妄竊老夫號  
詎敢重簪博士冠身退未妨閒養病年豐何幸且偷安

新篇似許參同社願刺仙舟上釣灘

賈生鵬賦大釣播物史記作大專槃

物索隱云專讀作鈞槃猶轉也義與播同

蒙恩許遂休致陳昭遠文以詩見賀已和荅之

復賦一首

閑干首宿久空槃未覺清羸帶眼寬老去光華姦黨籍  
向來羞辱侍臣冠極知此道無終否且喜閒身得暫安

漢祚中天那可料明年太歲又泥

湯昆反

灘

建隆庚申距今已未二百

四十年矣嘗記年十歲時先君慨然顧語某曰太祖受命至今百八十年矣歎息久之銘佩先訓於今甲子又復一周而衰病零落終無以少塞臣子之責因和此詩并記其語以示兒輩為之盡然感涕云

己未九日子服老弟及仲宣諸友載酒見過坐

閒居厚廟令出示佳句歎伏之餘次韻為謝并

呈同社諸名勝

籬菊斑斑半吐黃  
泥中又報紫萸香

輞川有茱萸泥字與津同

裝成

令節秋還晚  
撩得高情老更狂  
載酒極知乖勝踐  
沾衣

却免嘆斜陽

是日本約會於周園屬予有故不果出因集予舍

餘年只恐逢辰

少吟罷君詩引興長

和劉叔通懷游子蒙之韻

扣角聽君悲復悲  
壯心未已欲何之  
交游半落邱山外  
離別偏傷老大時  
尚喜淵潛容賈誼  
不須日飲教衰絲

病餘我更無憐，勉為同懷一賦詩。

余素不能作唐律和韻尤非所長年

來追逐殊覺牽強子服乃令更為予寫此三詩者不知欲以何用晨起書罷欲記歲月方覺是庚申開基節日

此亦難逢之會感嘆久之

### 絕句

#### 夜雨二首

擁衾獨宿聽寒雨，聲在荒庭竹樹間。萬里故園今夜永

遙知風雪滿前山。

故山風雪深寒夜，只有梅花獨自香。此日無人問消息，

不應憔悴損年芳

小盈道中

今朝行役是登臨  
極目郊原快賞心  
却笑從前嫌俗事  
一春牢落閉門深

魚山閣雨中

兩山相接雨冥冥  
四牖東西萬木青  
面似凍梨頭似雪  
後生誰與屬遺經

送籍溪胡大赴館供職二首

祖餞衣冠滿道周此行誰與話端由心知不作功名計  
祇為蒼生未敢休

執我仇讎我知謾將行止驗天機猿悲鶴怨因何事  
只恐先生袖手歸

寄籍溪胡丈及劉恭父二首

先生去上芸香閣閣老新裁多角冠留取幽人卧空谷  
一川風月要人看

甕牖前頭翠作屏晚來相對靜儀刑浮雲一任閒舒卷

萬古青山只麼青

仰思二首

公德明光萬世師從容酬酢更何疑當年不合知何事  
清夜端居獨仰思

聖賢事業理難同僭作新題欲自攻王事無施吾豈敢  
儻容思勉議成功

示四弟

務學修身要及時競辰須念隙駒馳清宵白日供遊蕩

愁殺堂前老古鉅

觀書有感二首

半畝方塘一鑒開  
天光雲影共徘徊  
問渠那得清如許  
為有源頭活水來

昨夜江邊春水生  
蒙衝巨艦一毛輕  
向來枉費推移力  
此日中流自在行

七日發嶽麓道中尋梅不獲至十日遇雪作此

自此後係  
南嶽唱酬



三日山行風繞林  
天寒歲暮客愁深  
心期已悞梅花笑  
急雪無端更滿襟

枯木次擇之韻

百年蟠木老聲牙  
偃蹇春風不肯花  
人道心情頑似汝  
不須持向我儂誇

夜宿方廣聞長老守榮化去敬夫感而賦詩因  
次其韻

拈椎豎拂事非真  
用力端須日日新  
只麼虛空打筋斗

思君辜負百年身

晚霞

日落西南第幾峰  
斷霞千里抹殘紅  
上方傑閣凭欄處  
欲盡餘暉怯晚風

讀林擇之二詩有感

自此後係  
東歸亂藁

筍輿隨望入寒烟  
每誦君詩輒黯然  
今夜定知連榻夢  
一時飛墮錫山前

竹輿傲兀聽嘔啞  
合眼歸心已到家  
遊子上堂慈母笑

豈知行李尚天涯

馬上贈林擇之

與君歸思渺悠哉  
馬上看山首共回  
認取山中奇絕處  
他年無事要重來

宿梅溪胡氏客館觀壁間題詩自警二絕

貪生莖豆不知羞  
覩面重來躡俊遊  
莫向清流浣衣袂  
恐君衣袂浣清流

十年湖海一身輕  
歸對黎渦却有情  
世路無如人欲險

幾人到此誤平生

擇之所和生字韻語極警切次韻謝之兼呈伯

崇

不是譏訶語太輕題詩只要警流情煩君屬和增危惕  
虎尾春冰寄此生

二十七日過毛山舖壁間題詩者皆言有毛女  
洞在山絕頂問之驛吏云狐魅所為耳因作此  
詩

人言毛女住青冥散髮吹簫夜夜聲却是郵童解端的  
向儂說是野狐精

臨江買舟

征驂聊駐近江樓南市津頭問買舟共說明朝乘雪水  
長歌一日到洪州

過樟木鎮晚晴二首

朝晴遣我看鄉林頃刻浮雲萬里陰拂袖凌風三十里  
依然寒日照長吟

飛雲極目疑梅嶺落日回頭夢橘洲從此不愁東路永  
祇應西望轉悠悠

竹節灘

船下清江竹節灘長烟漠漠水漫漫人家斷岸斜陽好  
客子中流薄暮寒

觀上藍賢老所藏張魏公手帖次王嘉叟韻

火風吹散早天雲膚寸空餘翰墨新拭淚相看渺今古  
堂堂那復有斯人

次韻伯崇登滕王閣感舊蓋聞往時延閣公拜  
疏於此云

金闕銀臺夢想中樓前拜舞早囊空十年殄瘁無窮恨  
歎息今人少古風

次韻擇之金步喜見大江有作

江頭四望遠峰稠江水中間自在流並岼東行三百里  
水源窮處即吾州

次韻擇之鉛山道中二首

幾月高堂闕問安歸塗不管上天難誦君兩疊思親句  
也信從來取友端

行盡江湘萬疊山家山猶在有無間明朝漸喜登閩嶺  
澗水分流響珮環

公濟和詩見閔耽書勉以教外之樂以詩請問  
二首

至理無言絕淺深塵塵剝剝不相侵如云教外傳真的  
却是瞿曇有兩心



未必瞿曇有兩心  
莫將此意攪儒林  
欲知陋巷憂時樂  
只向韋編絕處尋

和喜雨二絕

雨師誰遣送餘春  
珍重天公惠我民  
且看歡顏垂白叟  
莫愁頽頽踏青人

黃昏一雨到天明  
夢裏豐年有頌聲  
起望平疇烟草綠  
只今投筆事農耕

壬子三月二十七日聞迅雷有感

誰將神斧破頑陰地裂山開鬼失林我願君王法天造  
早施雄斷答羣心

讀李賓老玉澗詩偶成

獨抱瑤琴過玉溪琅然清夜月明時祇今已是無心久  
却怕山前荷簣知

淳熙甲辰中春精舍閒居戲作武夷櫂歌十首  
呈諸同遊相與一笑

武夷山上有仙靈山下寒流曲曲清欲識箇中竒絕處

櫂歌閒聽兩三聲

一曲溪邊上釣船  
幔亭峰影蘸晴川  
虹橋一斷無消息  
萬壑千巖鎖翠烟

二曲亭亭玉女峰  
插花臨水為誰容  
道人不再荒臺夢  
興入前山翠幾重

三曲君看架壑船  
不知停櫂幾何年  
桑田海水今如許  
泡沫風燈敢自憐

四曲東西兩石巖  
巖花垂露碧氍毹  
金鷄叫罷無人見

月滿空山水滿潭

五曲山高雲氣深  
長時烟雨暗平林  
林間有客無人識  
款乃聲中萬古心

六曲蒼屏遶碧灣  
茅茨終日掩柴關  
客來倚櫂巖花落  
猿鳥不驚春意閒

七曲移船上碧灘  
隱屏仙掌更回看  
人言此處無佳景  
只有石堂空翠寒

八曲風烟勢欲開  
鼓樓巖下水滌洄  
莫言此處無佳景

自是遊人不上來

九曲將窮眼豁然桑麻雨露見平川  
漁郎更覓桃源路除是人間別有天

劉子澄遠寄羊裘且有懷仁輔義之語戲成兩絕為謝以發千里一笑

短棹長蓑九曲灘晚來閒弄釣魚竿  
幾回欲過前灣去却怕斜風特地寒

誰把羊裘與醉披故人心事不相違  
狂奴今夜知何處

月冷風淒未肯歸

南城吳氏社倉書樓為余寫真如此因題其上  
蒼顏已是十年前把鏡回看一悵然履薄臨深諒無幾  
且將餘日付殘編

樂府

水調歌頭

富貴有餘樂貧賤不堪憂誰知天路幽險倚伏互相酬  
請看東門黃犬更聽華亭清唳千古恨難收何似鷗夷

子散髮弄扁舟  
鷗夷子成霸業有餘謀收身千乘卿  
相歸把釣魚釣春晝五湖烟浪秋夜一天雲月此外儘  
悠悠永棄人間事吾道付滄洲

又次袁機仲韻

長記與君別丹鳳九重城歸來故里愁思悵望渺難平  
今夕不知何夕得共寒潭烟艇一笑俯空明有酒往須  
醉無事莫闕情  
尋梅去跡竹外一枝橫與君吟弄風  
月端不負平生何處車塵不到有箇江天如許爭肯換

浮名只恐買山隱却要煉丹成

滿江紅劉知郡生朝

秀野詩翁念故山十年乖隔聊命駕朱門舊隱綠槐新  
陌好雨初晴仍半暖金釭玉斚開瑤席更流傳麗藻借  
江天留春色過里社將兒姪談往事悲陳迹喜尊前  
見在鏡中如昔兩鬢全欺烟樹綠方瞳好映寒潭碧但  
一年一度一歸來歡何極

菩薩蠻回文



晚紅飛盡春寒淺淺寒春盡飛紅晚尊酒綠陰繁繁陰  
綠酒尊老仙詩句好好句詩仙老長恨送年芳芳年  
送恨長

又次圭父回文韻

暮江寒碧縈長路路長縈碧寒江暮花塢夕陽斜斜陽  
夕塢花客愁無勝集集勝無愁客醒似醉多情情多  
醉似醒

念奴嬌用傅安道和朱希真梅詞韻

臨風一笑問羣芳誰是真香純白獨立無朋算只有姑  
射山頭仙客絕艷誰憐真心自保邈與塵緣隔天然殊  
勝不關風露冰雪 應笑俗李麤桃無言翻引得狂蜂  
輕蝶爭似黃昏閒弄影清淺一溪霜月畫角吹殘瑤臺  
夢斷直下成休歇綠陰青子莫教容易披折

和西江月

睡處林風瑟瑟覺來山月團團身心無累久輕安況有  
清涼池館 句穩翻嫌白俗情高却笑郊寒蘭膏元自

少陵殘好處金章不換

又

堂下水浮新綠門前樹長交枝晚涼快寫一篇詩不說  
人間憂喜身老心閒益壯形癯道勝還肥軟輪加壁  
未應遲莫道前非今是

鷓鴣天江檻詞

暮雨朝雲不自憐放教春漲綠浮天祇今畫閣臨無地  
宿昔新詩滿繫船青鳥外白鷗前幾生烟火舊因緣

酒闌山月移彫檻歌罷江風拂玳筵

又

已分江湖寄此生長簑短笠任陰晴鳴橈細雨滄洲遠  
繫舸斜陽畫閣明奇絕處未忘情幾時還得去尋盟  
江妃定許捐雙佩漁父何勞笑獨醒

浣溪沙次秀野酴醾韻

壓架年來雪作堆珍叢也是近移栽肯令容易放春回  
却恐陰晴無定度從教紅白一時開多情蜂蝶早飛

來

好事近

春色欲米時先散滿天風雪坐使七閩松竹變珠幢玉  
節中原佳氣鬱蔥蔥河山壯宮闕丞相功成千載映  
黃流清徹

鵬括杜牧之齊山詩作水調歌頭

江水浸雲影鴻雁欲南飛攜壺結客何處空翠眇烟霏  
塵世難逢一笑況有紫萸黃菊堪插滿頭歸風景今朝

是身世昔人非 酬佳節須酹酹莫相違人生如寄何  
事辛苦怨斜暉無盡今來古往多少春花秋月那更有  
危機與問牛山客何必獨沾衣

南歌子次張安國韻

落日照樓船穩過澄江一片天珍重使君留客意依然  
風月從今別一川離緒悄危絃永夜清霜透幕廬明  
日回頭江樹遠懷賢目斷晴空鴈字連

贊

六先生畫像贊

漁溪先生

道喪千載聖遠言湮不有先覺孰開我人書不盡言圖  
不盡意風月無邊庭草交翠

明道先生

揚休山立玉色金聲元氣之會渾然天成瑞日祥雲和  
風甘雨龍德正中厥施斯普

伊川先生

規員矩方繩直準平允矣君子展也大成布帛之文菽粟之味知德者希孰識其貴

康節先生

天挺人豪英邁蓋世駕風鞭霆歷覽無際手探月窟足躡天根間中今古醉裏乾坤

橫渠先生

早悅孫吳晚逃佛老勇撤臯比一變至道精思力踐妙契疾書訂頑之訓示我廣居



涑水先生

篤學力行清修苦節有德有言有功有烈深衣大帶張拱徐趨遺像凜然可肅薄夫

張敬夫畫象贊

擴仁義之端至於可以彌六合謹善利之判至於可以析秋毫拳拳乎其致主之切汲汲乎其幹父之勞屹屹乎其任道之勇卓卓乎其立心之高知之者識其春風沂水之樂不知者以為湖海一世之豪彼其揚休山立

之姿既與其不可傳者死矣觀於此者尚有以卜其見  
伊呂而失蕭曹也耶

呂伯恭畫象贊

以一身而備四氣之和以一心而涵千古之祕推其有  
足以尊主而庇民出其餘足以範俗而垂世然而狀貌  
不逾於中人衣冠不詭於流俗迎之而不見其來隨之  
而莫睹其躡矧是丹青孰形心曲惟嘗見之者於此而  
復見之焉則不但遺編之可續而已也

書畫象自敝

從容乎禮法之場沈潛乎仁義之府是予蓋將有意焉而力莫能與也佩先師之格言承前列之餘矩惟闇然而自修或庶幾乎斯語

聚星亭畫屏贊

并序

按世說陳太邱詣荀朗陵貧儉無僕役乃使元方將軍季方持杖從後長文尚小載著車

中

後漢書曰陳寔字仲弓潁川許人嘗為聞  
喜令遷太邱長修德清靜百姓以安後以

黨人連及逮捕人多逃避求免寔曰我不就  
獄衆無所恃乃請囚焉遇赦得出宦者張讓  
權傾天下父死歸葬顧川名士無往弔者而  
寔獨弔焉後復誅黨人讓以寔故多所全宥  
寔在鄉閭平心率物或有爭訟輒求判正曉  
譬曲直退無怨者黨禁解累徵不起年八十  
四卒諡曰文範先生又曰荀淑字季和潁川  
潁陰人也少有高行博學而不好章句州里  
稱其知人李膺李膺皆師宗之舉賢良方正  
對策譏刺貴倖梁冀忌之出補朗陵侯相後  
事明理稱為神君棄官而歸閭居養志又曰  
陳紀字元方寔長子也至德絕俗與寔高名  
並著而弟譙字季方又配之每宰府辟召羔  
鴈成羣世號三君百城皆圖畫紀子辟字長  
文為魏  
司空

既至荀使叔慈應門慈明行酒餘六

龍下食文若亦小坐著膝前

荀淑有八子儉

數居西豪里縣令苑康曰昔高陽有才子八人遂署其里為高陽里時人號曰八龍靖字

叔慈有至行不仕早卒號曰玄行先生爽字慈明年十二通春秋論語潁川為之語曰荀

氏八龍慈明無雙舉至孝拜郎中對策陳便宜數千言即棄官去後生黨銅隱遁十餘年

董卓用事微拜司空爽以卓忍暴終危社稷多舉才略之士與王允等密謀討之未及而

以病終後允乃竟誅卓緄子或字文若少時父以畏禍為取宦者唐衡女後從曹操操以

為謀主比之子房及操將受九錫於時太史或諫止之遂為所害或亦作郁

奏真人東行

續晉陽秋曰陳仲弓從諸子姪造荀父子於時德星聚太史奏

五百里  
賢人聚

考亭陳氏故有離榭名以聚星蓋取  
續陽秋語中更廢壞近始作新適邇敞廬因  
得相具役事既又為之本原事迹畫著屏上  
并為之贊以視來者云

猗與陳子神嶽鍾英文淵範懿道廣心平危孫汙隆卷  
舒自我是曰庶幾無不可獻身安衆弔豎全邦炯然  
方寸秋月寒江願言懷人曰我同志故朗陵君荀季和  
氏連峰對起麗澤潛滋優而不見有黯其思薄言造之

顧無僕役獨呼二兒駕予以出青芻黃犢布幘敝車策  
紀前衛杖謔後趨所造伊何高陽之里維時荀君聞至  
而喜顧謂汝靖往應於門七龍矯矯布席開尊靖肅而  
前翁拜其辱何悟斯晨得見清穆命奕行觴旅饋次陳  
獻酬交錯禮度情親載笑載言固非德義益邁乃猷以  
輔斯世髦髦兩稚亦寘膝前原深本固莫出匪賢維此  
慈明特謝傳匹晚際國屯敢憚濡迹贅旒之命恃以少  
延邦朋之最孰與為先郁乃附曹羣亦忘漢嗣守之難

古今共歎崇臺回極於以占天猶曰茲野德星萃焉我  
寓有亭舊蒙斯號今刺前聞象儀以告高山景行好德  
所同課忠責孝獨緊余衆百爾窺臨鏡考毋怠死國承  
家永奉明戒

箴

敬齋箴

讀張敬夫主一箴掇其遺意作敬齋箴書齋

壁以自儆云



正其衣冠尊其瞻視潛心以居對越上帝足容必重手  
容必恭擇地而蹈折旋蟻封出門如賓承事如祭戰戰  
兢兢罔敢或易守口如瓶防意如城洞洞屬屬罔敢或  
輕不東以西不南以北當事而存靡他其適弗貳以二  
弗參以三惟精惟一萬變是監從事於斯是曰持敬動  
靜無違表裏交正須臾有閒私欲萬端不火而熟不冰  
而寒毫釐有差天壤易處三綱既淪九法亦斁於戲小  
子念哉敬哉墨卿司戒敢告靈臺

銘

四齋銘

志道

曰趨而挹者孰履而持曰飢而寒者誰食而衣故道也者不可須臾離子不志於道獨罔罔其何之

據德

語道術則無往而不通談性命則疑獨而難窮惟其厚於外而薄於內故無地以崇之

依仁

舉之莫能勝行之莫能至雖欲依之安得而依之為仁  
由已而由人乎哉雖欲違之安得而違之

游藝

禮云樂云御射數書俯仰自得心安體舒是之謂游以  
游以居嗚呼游乎非有得於內孰能如此其從容而有  
餘乎

又四齋銘

崇德

尊我德性希聖學兮玩心神明蛻污濁兮

廣業

樂節禮樂道中庸兮克勤小物奏膚公兮

居仁

勝己之私復天理兮宅此廣居純不已兮

由義

羞惡爾汝勉擴充兮遵彼大路行無窮兮

學古齋銘

浦城周侯嗣恭葺其先大父徽猷公所作學  
古齋以教齊宗族子弟新安朱某為題其榜  
周侯又來請銘則推其意乃作銘曰

相古先民學以為己今也不然為人而已為己之學先  
誠其身君臣之義父子之仁聚辨居行無怠無忽至足  
之餘澤及萬物為人之學爛然春華誦數是力纂組是  
誇結駟懷金煌煌焯焯世俗之榮君子之鄙維是二者

其端則微眇綿弗察胡越其歸卓哉周侯克承先志日  
新此齋以迺米齋此齋何有有圖有書厥齋斯何衣冠  
進趨夜思晝行咨詢謀度絕今不為惟古是學先難後  
獲匪亟匪徐我其銘之以警厥初

尊德性齋銘

內弟程允夫以道問學名齋予謂當以尊德  
性易之允夫請銘因為作此

維皇上帝降此下民何以予之曰義與仁維義與仁維

帝之則欽斯承斯猶懼弗克孰昏且狂苟賤汙卑淫視傾  
聽惰其四肢褻天之明慢人之紀甘此下流衆惡之委  
我其監此祇采厥心有幽其室有赫其臨孰玉奉盈湏  
臾顛沛任重道遠其敢或怠

求放心齋銘

番陽程正思作求放心齋汪子卿祝汝玉既  
為之銘新安朱某掇其遺意復為作此

天地變化其心孔仁成之在我則主於身其主伊何神


明不測發揮萬變立此人極畧刻放之千里其奔非誠  
曷有非敬曷存孰放孰求孰亡孰有詘伸在臂反覆惟  
手防微謹獨茲守之常切問近思曰惟以相之

書字銘

明道先生曰某書字甚敬非是要字好只此  
是學

握管濡豪伸紙行墨一在其中點點畫畫放意則荒取  
妍則惑必有事焉神明厥德





御纂朱子全書卷六十六